

“Politiziranje škola u Federaciji se mora zaustaviti”

Visoki predstavnik se danas, u prostorijama OHR-a, sastao sa svim kantonalnim ministrima za obrazovanje kako bi ih pozvao da zaustave politiziranje obrazovanja, koje je već donijelo mnogo štete djeci u Bosni i Hercegovini, kao i da provedu reformu obrazovanja.

Na sastanku u OHR-u sa ministrima Stipom Ivankovićem (Kanton 2), Nikolom Lovrinovićem (Kanton 6), Jago Musom (Kanton 7), Jozom Marićem (Kanton 8) i Marinom Ivićem (Kanton 10) visoki predstavnik je pozvao ministre da održe obećanja koja su dali i prestanu sa odugovlačenjem u provedbi dogovorenih reformi. Naglasio je da obrazovne vlasti u Federaciji BiH moraju poštovati obaveze koje su preuzele novembru 2002. po pitanju reforme u oblasti obrazovanja i uraditi sve što je neophodno kako bi se proveli zahtjevi koje je Vijeće Evrope postavilo za period nakon prijema BiH.

Visoki predstavnik je istakao dva pitanja koja su naročito zabrinjavajuća, a to su izrada i usvajanje kantonalnih zakona o osnovnom i srednjem obrazovanju, koji moraju biti u skladu sa Okvirnim zakonom o osnovnom i srednjem obrazovanju na nivou BiH, te administrativno i pravno ujedinjavanje preostalih “dvije škole pod jednim krovom”.

Svi kantonalni ministri obrazovanja su potvrdili opredjeljenost za “Strategiju za reformu obrazovanja” u okviru koje je preuzeta obaveza da će se iz škola u potpunosti ukloniti diskriminacija, smanjiti svi nepotrebni naponi i dupliciranje poslova i sredstava, te ukloniti osnovni nedostaci u sistemu obrazovanja. Međutim, kao što je visoki predstavnik rekao ministrima, napredak postignut u provedbi

ovih reformi je ili zanemariv ili je u potpunosti izostao, uprkos činjenici da je to jedan od uslova koje je postavilo Vijeće Evrope za period poslije prijema.

Visoki predstavnik je rekao kako očekuje da će nadležni kantonalni i općinski organi do 15. marta donijeti odluke kako bi završili administrativno ujedinjavanje "dvije škole pod jednim krovom". Dodao je kako očekuje da kantonalna ministarstva obrazovanja i ministri pruže punu podršku administrativnom ujedinjavanju u svim slučajevima gdje postoje "dvije škole pod jednim krovom" u kantonima pod svojom nadležnošću."

"Administrativno ujedinjavanje je tehnički i pravni postupak" rekao je visoki predstavnik. "To znači da su postojeće dvije škole pod jednim krovom registrirane kao jedinstvena pravna lica sa jednim direktorom škole i jednim školskim odborom – što ne utiče na nastavni plan i program koji se provodi niti jezike koji se govore u školi." Visoki predstavnik je naglasio da kantonalni ministri obrazovanja moraju "objasniti da administrativno ujedinjavanje neće uticati na jezik ili nastavni plan i program."

Pet ministara koji su prisustvovali sastanku bili su među onima koji su izradili i donijeli ove reforme i oni su ti koji moraju osigurati da ih nadležni kantonalni i općinski organi ispoštuju. "Vaš je posao da osigurate da se provedu obaveze koje ste preuzeli vašim potpisom i da spriječite, a ne pospješujete, politiziranje obrazovanja u ovoj zemlji," rekao je visoki predstavnik petorici ministara obrazovanja. "Ukoliko obrazovanje djece i dalje bude trpilo posljedice, za to ćete odgovornost snositi vi i vaša ministarstva."